

ՄԱՍՈՒԼԻ ՀԱՂՈՐԴԱԳՐՈՒԹՅՈՒՆ



2007 թվականի պետական վիճակագրական աշխատանքների ծրագրի կատարման ընթացքի մասին

«Հայաստանի Հանրապետության 2007-2009 թվականների պետական վիճակագրական աշխատանքների եռամյա ծրագիրը հաստատելու մասին» (այսուհետ՝ Եռամյա ծրագիր) ՀՀ օրենքով (ՀՕ-212-Ն, ՀՀ պաշտոնական տեղեկագիր, 25 դեկտեմբերի 2006թ., թիվ 66 (521)) սահմանված ուղղությունների իրագործումն ապահովող միջոցառումները, «Պետական վիճակագրության մասին» ՀՀ օրենքի 10 և 11 հոդվածներով սահմանված պահանջների համաձայն, արտացոլվել են «2007 թվականի պետական վիճակագրական աշխատանքների ծրագրում», ինչը հաստատվել է ՀՀ վիճակագրության պետական խորհրդի (այսուհետ՝ ՀՀ ՎՊԽ) կողմից և հրապարակվել (ՀՀ Գերատեսչական նորմատիվ ակտերի տեղեկագիր (ԳՆԱՏ) թիվ 2¹, 31 հունվարի 2007թ.):

Հիմք ընդունելով պետական վիճակագրական աշխատանքների տարեկան ծրագրով սահմանված աշխատանքները (միջոցառումները), 2007թ. առաջին կիսամյակում

նախատեսված և իրականացման ենթակա աշխատանքների ընդհանուր ծավալը (հաշվի առած պարբերականությունը) կազմել է 989 միավոր, որից իրականացվել են 989-ը կամ 100%-ը:

2007թ. առաջին կիսամյակում թղթային և էլեկտրոնային կրիչներով հրապարակվել են 20 անվանում վիճակագրական հրապարակումներ (թղթային կրիչներով մոտ 3679 տպաքանակով), որոնք զետեղված են նաև ՀՀ ազգային վիճակագրական ծառայության (այսուհետ՝ ՀՀ ԱՎԾ) բաց գրադարանում (գրադարանային ֆոնդը 01.07.2007թ. դրությամբ կազմել է 8850 միավոր) և 1999թ. ապրիլից գործող ՀՀ ԱՎԾ ինտերնետային էջում:

Տեղեկատվության միջպետական և միջազգային փոխանակման շրջանակում 2007թ. առաջին կիսամյակում հրապարակման նպատակով համապատասխան վիճակագրական կազմակերպություններին է տրամադրվել թվով 122 անվանում լրացված հարցաթերթ:

2007թ. առաջին կիսամյակում ՀՀ ԱՎԾ են այցելել միջազգային կազմակերպությունների և օտարերկրյա ազգային վիճակագրական ծառայությունների 4 հանձնախումբ և 4 փորձագետ: ՀՀ ԱՎԾ աշխատակիցները մասնակցել են արտասահմանյան 10 երկրում կազմակերպված վերապատրաստման դասընթացների, աշխատանքային հանդիպումների, միջազգային համաժողովների, նստաշրջանների, սեմինարների և այլ միջոցառումների (այցեմասնակցությունների թիվը՝ 29):

Հայաստանում կազմակերպված նմանատիպ միջգերատեսչական բնույթի և այլ կազմակերպությունների մասնակցությամբ միջոցառումներին ՀՀ ԱՎԾ աշխատակիցների այցեմասնակցությունները կազմել են 14: Իսկ ՀՀ ԱՎԾ-ում կազմակերպված 7 սեմինար-խորհրդակցությանը նրանց այցեմասնակցությունների թիվը կազմել է 222:

2007թ. առաջին կիսամյակում ՀՀ ՎՊԽ կողմից ընդունվել է 25 որոշում, որից 11 նորմատիվ և 14 անհատական: Նորմատիվ որոշումները ՀՀ արդարադատության նախարարության կողմից գրանցվել են և հրապարակվել ՀՀ ԳՆԱՏ-ներում:

«2007 թվականի պետական վիճակագրական աշխատանքների ծրագիրը» կազմված է 2007-2009 թվականների Եռամյա ծրագրի հիման վրա: Եռամյա ծրագրով սահմանված ուղղությունները խարսխված են ՄԱԿ-ի Եվրոպական տնտեսական հանձնաժողովի (15.04.1992թ.) և ՄԱԿ-ի վիճակագրական հանձնաժողովի (14.04.1994թ.) կողմից ընդունված՝ «Պաշտոնական վիճակագրության հիմնարար սկզբունքներ»-ի և դրանց հիման վրա մշակված վիճակագրության միջազգային չափանիշների և ստանդարտների վրա: Պաշտոնական վիճակագրության միջազգային ստանդարտները և երկրների վիճակագրությունների՝ դրանց համապատասխանությունը վարում է Արժույթի միջազգային հիմնադրամը (այսուհետ՝ ԱՄՀ):

ԱՄՀ-ի Տվյալների տարածման հատուկ ստանդարտը (SSՀՄ) պարունակում է ստանդարտների մշտական պահպանման խիստ պահանջներ, ինչի վերաբերյալ տեղեկությունը հրապարակայնորեն առկա է ԱՄՀ Ստանդարտների տարածման տեղեկագրում՝ <http://dsbb.imf.org/Applications/web/dsbbhome/> (ԱՄՀ SSՀՄ-ին Հայաստանն անդամագրվել է 2003թ. նոյեմբերի 7-ից): Ստանդարտների տարածման տեղեկագիրը ներկայումս ներառում է համապարփակ մեթոդաբանական փաստաթղթեր (մեթատվյալներ) անգլերեն լեզվով (հայերեն և ռուսերեն տարբերակներն առկա են ՀՀ ԱՎԾ ինտերնետային կայքում՝

<http://www.armstat.am/acm/Metadata/default.htm>) ՏՏՀՄ տվյալների կատեգորիաների մասով ՀՀ վիճակագրական փորձառության վերաբերյալ, ինչն արտացոլում են ՀՀ ԱՎԾ կողմից վարվող Ազգային ամփոփ տվյալների էջում ներառված երկրի արդիական տվյալները՝ <http://docs.armstat.am/nsdp/>:

Կից ներկայացվում է «ՀՀ սոցիալ-տնտեսական վիճակը 2007 թվականի հունվար-հունիսին» տեղեկատվական ամսական զեկույցը, որի էլեկտրոնային տարբերակն առկա է ՀՀ ԱՎԾ ինտերնետային էջում՝ www.armstat.am:

ՀՀ վիճակագրության պետական խորհուրդ